

國朝文錄續編

集虛齋文錄引

涪安方文輒先生以時文名天下久矣論者以配薛中子張曉樓以其銳思深入可與張之大儲之堅並稱也顧先生詣力所至雅不欲以時文自畫其爲陳先生文序也謂大士浸淫卷軸不保而用之于古而狼籍于時文爲可惜且恨大士時文如此其精而所著太乙山房古文則多可笑豈物莫能兩大歟抑精力萃于時文而其餘遂不免衝風之末也先生此言情固見乎詞矣蓋先生少從毛西河先生讀書說經皆遵古法而義理則折衷朱子亦不效毛氏之排擯長與何義門儲六雅方望溪諸先生遊諸先生

皆嫻于文律不容一語出入者而先生則銳思深入以其
爲時文之精力復端端從事于古而淫焉癖焉加之以奇
恣故每拈一題皆言人所未嘗言開章一篇言道必與文
俱卽足歷宋元以後之能言者而使之下其他微言大義
可爲典要者極多而用筆則巉巉巖巖力矯庸熟蹊徑捷
出皆古人履齒之所未經且剝削浮蕪行墨間無一冗字
使大士見之當恨其不幸早生未與切磋矣其與王立甫
書也謂韓曰文無難易惟其是李曰文無難易極于工先
生蓋從事于難而兼有其是且工者但好用雜書笑譏罵
侮不盡雅馴又好以古人語言改易尋常字句有似宋人

之此戶篠簞殆宋子京之流學韓而流爲孫樵劉轅者也
然而得此于今日實拔戟自成一隊矣此集吾家原有不
知誰何從架上抽去此本從正之處借得吾友愚溪先爲
閱過以書抵我謂其以深邃之思運之以古峭之筆而發
爲剛健之文洵知言之選也今錄其文爲一卷

集虛齋文錄

還淳方粲如文軒著

後學上高李祖陶欽之評

道與文俱

歐陽子曰吾所爲文必與道俱某則一言以變之曰吾所爲道必與文俱今稱載道之文者五經然文必如五經始能以載道自五經後言道者世多有其書至宋而益浩浩若烟海其間號爲得不傳之學者仰視天俯畫地中更人事旁涉物怪上追本始之茫茫下極諸元會運世之窮無所入以復歸于溟滓皆言其理而筆之於書精無倫而大不可圍徃徃出于五經之文之所不到意且超而越焉然

而五經之文回薄萬古光景若日月凡此儒書則使人讀
未竟一紙欠申思睡者過半是何也道有餘而文不足起
之也文不足起之而至使人欠申而思睡則道翳翳而愈
伏不唯不並驅五經而并不能與揚子之法言王氏之中
說韓子之原道原性諸篇爭黃池之長夫此皆諸儒所不
滿以爲道不足而彊言者也而因文見道文極于工遂聳
其書于得不傳之學者之上且夫左氏之巫也公羊之短
也穀梁之俗也史遷之是非謬于聖人也班氏之排正直
否死節也皆非知道者也老莊列則道其所道荀子之道
亦同門而異戶外此法家名家雜家如韓公子呂覽淮南

之屬戰國短長家言傾危權變其于道疑無一豪可論而
學士家玩其華食其實直與五經流通相餽饌任諸儒老
先生排擯毀斥之口燥唇乾卒不能使之回面易向舉所
業而投諸水火蓋文之入人肝脾有如此雖無道者猶將
申焉然則道之必與文俱也決矣抑非獨此而已經故以
道法勝然唯易與春秋無間然詩書雖經聖人手而如呂
刑文侯之命儒先既有違言矣又謂鄭風卽鄭聲之淫夫
淫復何道禮記成于漢人由諸儒言之其背理傷道者難
徧以疏舉將以周禮當之而或詆爲瀆亂不經之書或又
以爲六國陰謀之書儀禮則形而下者耳雖號爲經未多

乎道而其光景之回薄萬古者諸經若一不以損其毫毛
顧反苦繩諸文人見有一言之不幾乎道卽貶剝之令一
錢不直以己之不好而并禁人之好之嗚呼此何理也相
馬者期於驥驥之德力不可必得而必待驥而乘之不得
驥雖馬之奔蹏力可致千里者皆斥棄異阜不以服箱爲
其將折輓而摧轅也而反任驚下以晦驥之乘駕蹇驢而
無策駟跛蟹而上山將沒世不行尋常而又何路之能極
是故有道而文者上也道不足而文者次之文不足而道
者又次之雖詭于道而其文深妙竒博使人不覺入其玄
中者又次之言之無文而託諸道以逃其樸鈍枯朽則無

次某之爲此言也重文也乃所以重道也昔者莊周言道
蓋無所不在稊稊歟每下愈況其序天下篇凡一曲百
家皆標爲古之道術有在是者是故荀卿之非十二子也
必曰其持之有故其言之成理夫其有故而成理也卽道
也朱子譏蘇氏亦曰出入有無曲成義理夫其出入而曲
成也卽道也詭乎道以爲文要之文仍不離所爲道而或
者謂辨道不可燿文欲以樸鈍枯朽之學嚆嚈道真夫人
之棄其文也若棄泥塗矣又安所得道而辨之然則無文
者道之賊也重文乃所以重道雖謂某之說卽歐陽子之
說可也

滂沛恣肆實爲至論予喜讀朱子文集而不喜讀朱子語錄職此之故

書華豫原事

無錫有奇士曰華豫原方歲乙未撫吳儀封張公坐事選部使者偕制府卽訊于潤州而羈管公城隍廟中而守之生猶如乳虎非著門籍不得輒出入門生故吏無敢嚮邇者豫原聞難自無錫疾馳一晝夜踰三百里至京口唁焉旣抵廟門不得入而顧見有官人傳呼來帶弓韉騎而從者數人至門門焉者皆卻立官人下馬入從者皆入豫原則闐然隨之入數折而達張公請室門外卽又不得入徘徊往來所以屬其門者方故萬端然卒不得入門者曰客何爲者始吾以客爲從官人來故不誰何客乃今知妄男

子耳不去且得罪制府怒不可犯也豫原大笑應曰若乃以制府嚇我耶向令吾惴惴制府者吾安得來此且天下事不可知往者張公嘗與噶禮訟矣部使者按事至再無直張公者賴天子明聖張公撫吳自如而噶禮卒詆罪以去此近事于今未冷今張公雖就逮萬一上復有後命如異時事若等何面目復見張公言已則索筆大書其爵里名姓付門者達張公所曰可達達之不可則以此紙上制府言狀惟制府死生當是時日漸西夕而豫原語侵制府益急門者縮頸既已無可奈何則入白守者而守者亦頗聞餘語色動爲言于張公張公命之入豫原乃入

相勞苦如平生歡良久辭去越數日而部使者之祠報燬
矣初部使者視學江左有聲吳中人士爲祠于江陰歌樂
之當張公之與噶禮交訟也部使者按事至吳吳中自士
大夫下遮馬首以千萬數願無奪我張公而部使者顧不
直張公吳中人固怒甚及是役也部使者與制府劾張公
欺謾不讎罪且至殊死吳中人咸涕泣不知所爲而會豫
原自京口來具言張公就逮良苦則益洶洶然顧無所發
怒豫原遂言曰狄梁公之有祠魏州也其子景暉弗類魏
州人燬之不復祠今日之事得復有香火情耶吾欲云云
如何于是衆數千人奔部使者祠下爭徹屋瓦投之以巨

牛東西曳橈棟盡折或焚燒其餘呼聲動天埃起漲數十
里明日制府聞狀大駭陰使人廉問主名疏以去然竟無
加何也當是時豫原幾不免亦以此名聞江淮間豫原名
希閔好讀書學治古文著有廣事類賦等書行於世以涇
縣訓導副江南辛卯解試榜丁酉試京兆復得副榜主試
者卽故撫吳張公也識者兩難之方子曰余居京師遇江
南人徃徃爲余言豫原周旋張公事余壯之已豫原就京
兆試定交王翦林太史坐上視其斂退就懦粥粥若無能
者而遇公正發憤乃若是上卒不用部使者議而驛召
張公命以白衣領倉場職其事距燬祠蓋不數月豫原之

於張公可調與天合符者也。豫原又言方事之殷也，江都有程表民如畢有姜白芸者，與某相倚若左右手而先是張公與噶禮交，劾時自芸護之，尤力舉幡率數萬人行詣闕上書郡長至使人守欲殺之，亦會張公得俞旨而罷。余恨未見表民而自芸辱與余善，名畊亦一奇士。世乃有此人與望溪集中書史可法謁平公事相類，太史公復作定收入游俠傳矣。

與王立甫書

姚念慈來辱手書過有所推下讀之面具重甲抑人有言
許與過當有傷準的既自愧又懼爲足下累也如何足下
所示詩骨清不噎醃醃有味古文矜絜自貴壽業君尤能
持論僕素不肯爲頌禱之詞讀足下文乃知道在瓦礫而
恨曩者之自無閭浮黠金汁也足下成就業若此僕方欲
下涪翁之拜而又何求焉僕幼狂齠髫辰終酉讀書不能
度十行少長而啄腥吞腐學爲應用之文居三家邨中亦
無與道古者先君子不知其鴛下經書外頗授以三傳史
漢韓柳文而旁及牧之可之輩曰成學治古文當取是退

而尋今世古文乃無一毫相似尤與者久之後稍從西河
毛先生遊觀所論著及一切口講指畫往往闇與先君子
會三卿爲主粗有悟入而方爲諸生牽率程課間一磨毫
黷札世率謂爲不可時施也而歎歎之今三十年所矣雖
以父師緒言不可卒變而旋其面目了不長進每有所作
緣手輒拉雜燒去自謂頗知人間羞耻事不圖足下乃復
云云也僕嘗以古文盛于唐而論文之旨亦莫如唐備昌
黎語劉正夫曰文無難易唯其是習之語王載言曰文無
難易極于工此二言者如左右手斷其一則兩俱廢不是
非工也不工非是也故皇甫持正之誌昌黎也曰至是歸

工則既盡之矣雖然爲此者有族有祖昌黎蓋祖左史楊
子雲而以劉向班固輩爲之族故其文奇而法河東蓋祖
國語漢書而以杜欽谷永輩爲之族故其文密而至樊川
則已固矣然所祖者尙在賈太傅晁家令而以韓柳爲之
族故其文散朗勁俠得韓一體習之持正及可之輩不能
紀遠祖于韓而還相爲族故論者以爲學韓而不至失其
學韓也茲所以不至也賴其才力雄獨故尙能持門戶苟
才減諸人則不勝困躓矣如義山襲美等皆是也審知足
下銳意鑽仰蓋不在唐以下然尙望叩其祖與族之所處
而倍道趨之則脩母致子于韓柳樊川尙可得意仿佛次

不失持正可之諸公下亦徑到義山皮陸輩故曰圖王不
成其獎猶可以霸僕老矣念足下方年華日富不厭高深
故敢勸爲之駕雖然足下既成就若此其庸有不知而待
僕之搖舌于口乎若僕者所謂獻遼東白頭豕者也某再
拜

古文無難易在是且工此語擷撲不破而祖族之辨尤
悉世之高論是非者皆盲人道黑白者也

答謝生書

先公遂騎箕尾八千里路消息不相聞走嚙無時有爲位而哭耳辱命使銘其埋嗚呼何可當也僕故未習爲銘章也見今之爲銘章者彌不習見今之爲巨公貴人銘章者則彌不習雖微僕而已起古之習爲銘章如昌黎柳州廬陵臨川諸公使見今之銘其巨公貴人之章亦當以不習爲解蓋古之應銘法者三脩之于身施之于事見之于言有一焉則雖其人無五兩之綬半通之銅而有道而文者不靳與之銘書之刻之一片倣嚴施于孫子不必其巨公貴人也而爲之銘者亦不必巨公貴人惟有道而文者是

使而今之應銘法者亦有三一曰家世如所云四世五公
一門七侯也則書一曰官階如所云四時仕宦三臺周歷
也則書一曰恩賜如所云金帶肉盼玉案推食也則書行
間茂密舉體沓拖如此而已矣往者佛助魏書名爲藏史
宋臣之表上魏書也以調終篇累卷皆官爵州名鹽之生
厥不圖今誌墓者乃復似之不似之乃反以爲不當律令
不合時宜烏呼世而無韓柳歐王也世而有韓柳歐王設
不焚其筆研惡言詈詞有倍萬當日錢公輔者矣且夫今
世所云亦奚不應銘法之有傳稱保姓受氏以守宗祏祿
之大者非家世乎周禮爵以馭其貴非官階乎予以馭其

幸非恩賜乎若是則奚不應銘法之有雖然有修之于身
施之于事見之于言者而橫侈此三事以蓋之是豈橫而
還其珠也無修之于身施之于事見之于言者而空借此
三事以榮之是負且乘致寇至而爲其先人發笑以自黜
也此之謂不孝而又將使見之者謂特官人以世耳爵及
惡德耳恩及私暱耳是自明揚主上之過而公與私交病
也此之謂不忠一舉而數不善備焉然且曰律令曰時宜
嗚呼其將胥天下之誌墓者而爲後人作鎮石邪僕非有
道而文者一斤不復無頭銜以焜耀人望而按前肘後又
率皆韓柳歐王輩遺下冊子度不可卒變世棄君平未有

以此事謁而來請其有之亦必先以荆公所云拙文自有
意義不可改者與之約三章焉然後敢拜命之辱請者遂
逆罷去今足下方成進士爲時聞人恐未肯顧僕息壤爲
先公作此冷淡生活也先公行應銘法于古今人所尙三
事蓋皆挾而有之在下筆時手一上下耳世不乏巨公貴
人能赴足下顛蹶之請者幸留意焉某月日某再拜

一意翻兩層講後層說到不孝不忠尤爲劇心怵目

治古堂文集序

文至於適焉止矣柳子云搜擇融液與道大適李習之云
辭與意適固其抵於道而意以幹之詞以柯葉張王之參
相得焉以唯變所適而立均出度又適至是而止是之謂
適斯言也余聞之坦菴呂公康熙乙未公貳司農督倉潞
河余以事謁節樓公與語移日述先世忠節公兄弟死流
寇事衛肝腦血凍凍生氣已乃及文章家利病公出治古
堂刻本一帙示余口呼手畫自周秦兩漢下逮唐宋大家
羅絡旁午可一二三四數也公言文章之橫流也自有明
諸君子始人是其所私學各立一糟粕之古人爲之尸左

右祖之東西溝之而左史與韓歐遂爲老死之不相往來
曰不類莊生有言萬物皆種也以不同形相禪今有祖禰
于此見其子若孫之面之不猶吾面遂疑非其種而鋤之
而子若孫閱上世之圖狀貌凡書篋几杖衣裳俎豆一切
非凡所見則又曰非吾祖也吾不知然則有似之而非者
其必且爲崇禎之過墓而號而仞賊作子也決矣嗚呼此
所謂惑易也余聞言而寤長跼請公之指南公因從容爲
開示方便如前指則唯唯退持其所謂適者遍勘于周秦
兩漢以及唐宋大家則爽然解又以之勘于魏晉六季間
一二錚錚佼佼者卽又爽然解卽又持所謂適者還勘于

公所示治古堂諸篇則又輒然解而函牛之鼎染指嘗之不能盡奇味以足于口蓋噍然者于今且三十年乃甫得其大全觀之妄意公之文卽公之所以爲詩主于美教化移風俗如大序云云者蓋衷于道而含意聯詞卽因之其間颺扇波委易格異狀左史韓歐合于無倪凡皆善者機也一言以蔽之曰適而已矣然公子待孫爲余言公學詩早矣至四十始爲古文嗟乎物不素具不可應卒公有所以爲古文者豈必在爲古文時唐史稱高達夫五十始爲詩詩卽工夫唐人于詩非者習之達夫不應獨遲之中書大抵如李將軍射度不中不發發卽應弦而倒耳蓋工而

後詩非詩而卽王也私心擬公毋亦倣此意乎余獨惜有
個儻非常挾雋上之才不生百許年後得公爲之揀荒爪
幕而余有天幸乃如皇甫之得訣于吏部也于是乎書

文至于適焉止矣最爲妙論適者非徒文從字順也排
冪而能妥帖清高而能深穩皆是也以唐而論韓之奇
柳之奧皆適也杜牧之磊砢孫樵之峭削皆適也蓋文
章自有天然節奏增一字則不適減一字亦不適故惟
其是極于工之外又當足之曰至于適

翰林院編修贈侍讀學士義門何先生墓誌銘

康熙六十一年壬寅六月九日前翰林院編修義門何先生焯以疾卒於京邸時先生失職而仍校書 丙廷上聞其卒也爲不怡者良久且曰何焯勤學問祇事有年方欲拂拭用之而忽焉以沒深可憫傷還其前官 贈侍讀學士旌其魂賻金給符傳以過喪而家在長洲有司用歲時存卹蓋異數也先生少而奇爲秋岳曹公言遠王公所器重旣冠以崇明學生選拔入大學名聲徹鄉先生諸公要人爭欲令出門下而先生淑梗有理偶語及故撫吳湯文正事見鄉先生微反唇卽爲之氣息勃然而他日點

勘塲屋程文不如意者十居七八鄉先生見之氣涸如山
戒門以絕仍訟之大府會大府前以事嫌鄉先生故得不
重坐然六試京兆六報罷其一既俛得之矣又擠而止之
猶尙以前過也歲壬午 聖祖冬狩駐涿州安溪李文

貞公時撫直隸迎謁道左 上從容問野甯有遺賢乎公

以先生對既 召試遂直 南書房 賜舉人偕禮部試

禮部試不第又 賜進士對策高等改庶吉士 命侍讀

八員勒府充 武英殿纂脩當是時李文貞公號得君一

經品題聲生勢長數薦人起家爲顯官去而于先生猶臭

味然吹噓送上人謂何天之衢道且大行也然久之散館

不授職得 旨再教習三年而先生丁外艱歸服既闋又
丁繼母艱於是先生無宦情將閉戶著書浮沉閭巷間老
矣已而又以文貞公薦赴 闕廷加授翰林院編修是爲
歲甲午其明年有以蜚語聞者 上還自熱河緣道問何
焯安在卽從迎 駕所收繫之并簿錄舍中書載以兼兩
交 內庭學士檢視諸非所宜言者大索數日不得獨得
論俗下文字及詆譏當世士大夫笑譏罵侮有人所不堪
語黏籤以聞而書夾中有邵吳縣令餽金一札藁并呈之
上閱之怒霽中摘數條遣內侍賫獄呵問反報薄其罪
僅坐免官直 武英殿自若也方事之殷也雷電交至銀

鎗纍在其頸邊觀者爲之五色無主而先生意氣自如
略不損眠食危坐讀易聲震戶外承譴問隨事自辨數奏
對凡數百言字畫端謹無一譌脫守視吏聚觀歎息謂漢
兒乃有此人旣出獄直殿廷事益勤辰入酉出不辟寒
暑他人有弛置自便不了事者間爲手了之如是者六七
年旣艱旣瘁痼疾乃發氣乘肺溢爲水浮膚以卒年六十
二矣先生書不去前閱觀博考而貫之以一大抵經史爲
主盟其讀經必得經所以云之意而不取輔漢卿曰此盍
脫郎也讀史必熟其事變之血脈而不取胡致堂曰此坐
談客也人必論其世體必究諸用苛濫不作亦不苟爲異

同蓋將與儒生俗吏不識時務者一雪此言有用我則慎
斯術以往非筆墨間事也書籤壓鄴架以善本對其校讎
至再三必如劉中壘所云殺青可繼寫者乃已所著詩歌
古文數百篇語古齋識小錄十數卷方簿錄時門弟子恐
中有根觸語悉付一炬成焦土云喜譚經生藝爲經生藝
者往往持質先生冀以游揚聲譽而先生不肯爲背面遇
有佳作逢人說項一不當意閱畢卽以如意帖几上不置
一詞當之者辱過撻市以是多怨者異時蜚語之聞未必
非此輩文致而先生勿之悔有來者仍率胸懷待之書法
精妙與人尺牘人皆藏去以爲榮嘗奉 聖祖命寫朱子

四書章句集註錢其板貯 禁中俟頒也愼行孝弟事後
母者再而皆得其歡居憂時有甘露降庭樹推財與諸弟
者數數也遇親故皆有恩而守節清苦已顧不妄受人一
錢初字潤千哭其母更字毗瞻先世當元統間有以義行
旌門者先生取名其書塾學者復稱義門先生曾大父思
佐妣楊氏大父應登妣陸氏父棟妣陸氏吳氏陳氏三世
皆以諸生老而鍾美于先生當顯矣既窆復享仍不竟其
用有子雲龍邑諸生也相方諷日屬銘其埋而以沈君冠
雲之狀來因敘而系之詩曰千古有訓君相者造命以一
字而拔人決起千仞入冥門俟聽先生之初晉如而摧如

值啟事之山公 帝曰女俞俾禮堂定書一落千丈推墮
兮滉漾終遇雨以說孤蘇而復上將利有攸往匪辰匪已
遽呼兮起起潤餘名于枯骨丹旌徙倚榮光在蒿里烏呼
三不朽之一其言也立先生有言兮滿堂滿室經律稽誦
兮子史翔集繭絲牛毛兮龍文虎脊藏之名山兮通都大
邑世無解人兮索之不得後有聖人兮俟之不惑烏呼先
生安此乎宅

此誌自云據沈冠雲狀實則轉詳于狀以本熟悉其爲
人不待狀也用是知文必以簡貴爲主者偏必如此而
請事始盡

明經處士周六雲先生墓誌銘

吾邑前直新安江江水淺深見底南山之綠倒卧焉分沙
漏石明燭須麋沈隱侯詩所謂千仞寫喬樹百丈見游鱗
是也士生其間方寸湛然可以乎對山水者則惟六雲周
先生先生名上治初字綬王而以鐵餐爲其號貌清而脩
長指爪眼開合有紅光巉巉玉骨見衣表顧能屹然而立
者終日好讀書自中經四部外凡在簡素罕有不津逮而
博觀約取度其本末而立衷焉以歸宿于易論語其于二
書箋注紛羅密幾無際章句小儒讀之不解作何語也所
居邑西偏邑長顧希見其面足未嘗至市井一日縱步行

忘路之遠也忽叩首見麗譙遽反走若迷陽之傷吾行者
校中課士發子游爲武城宰題把文而謁者滿街先生屏
勿省曰此何等題也後世復有澹臺生如吾輩其人乃能
爲之不相面而相背則邑諸生某某者于由徑至室冷暖
自知或時得一二公等碌碌兩無著手處卽安得搖其筆
端其高自標致眼底無餘子如此所與游多一時名士而
于徐少宗伯蘋村投分尤深蓋先生嘗受知學使者谷公
霖蒼再試皆第一實蘋村暗中摸索之蘋村旣官 禁近
而先生以年資貢太學蘋村歡然好逆爲言于國子先生
欲延以都講而先生投策禮曹則已單僕孱驢出春明門

吳徵君傳

徵君吳氏名農祥字慶百一字星叟故錢唐諸生也其先
自海鹽海甯再徙而家於此曾祖上世皆不顯至祖繼志
始仕雲南越州衛經歷父太沖明崇禎辛未進士由翰林
累官右學功右中允徵君其長子也兒時爲馬文忠公世
奇所知曰他日當以文冠世年十許歲數往來婦翁家婦
翁者傅巖也會三九公讌陳公函輝發題命坐客各製笑
藪露下落賦徵君最下坐砥筆賦就未遑綴以詩其落句
云一輩少年爭跋扈明公從此願躬耕陳公歎爲英異者
久之初徵君祖經歷君好聚書且勤掌錄祕閣之鈔逾萬

卷及宮允鼎貴則家益有賜書軸帶帙籤至與山陰元氏
海虞錢氏埒於是徵君旣長構樓于別業之梧園儲書其
上與弟農復登樓而去其梯戒不聞世上語盡發所藏書
讀之朱墨勾稽識其大者旁又囊篋細碎囚鎖怪異搜逖
疑互並潰漏發筆語則纒纒然居久之會康熙戊午

天子開博學宏詞科徵君以大司空陳數永薦被牒書敦
迫上道至京師辭於通政司者三辭於吏部者二皆不報
明年三月試太和殿庭上命三大學士暨掌院學士
定甲乙徵君卷議在甲伍中有日矣已而不與上又顧
大學士等舉所遺舉所遺則首以徵君聞已又不與或曰

是有以蜚語聞者或曰是索其卷無有故罷其事秘不可知也徵君之至京師也大學士馮文勤公溥客之代舍時稱佳山堂六子六子者陳維崧毛奇齡吳任臣王嗣槐徐林鴻及徵君也維崧奇齡任臣既入史館嗣槐試不及格而用天子後命留官中書舍人獨林鴻與徵君不就徵君尤倦遊既宿留不耦則乘薄舂車出郭門藥囊書帙獲破藍藍然送者自大學士馮公以下吁嗟歎之徵君曾不芥蒂曰吾道蓋是乃今可遂吾初服矣徵君鳶肩鹄鼻鶴脰指爪長三寸須鬚鬚頽然淵放得錢輒付酒家而識微見遠畧不干人以私人亦無敢干以私者社事之殷也吳

下士沿復社故態角爲尊奢門戶各分不通水火而浙西
郡若讀書秋聲登樓亭社及慎交諸社爭立名字應之名
欲引徵君書幣交戶外者屢且滿徵君曰是載甌見餉也
諸君子忘東京鉤黨事乎不答書亦不發視其後 天子
果切齒諸爲社事者盡搜所刊錄摧燒之於今著爲令世
咸以徵君知幾 國初通籍者徃徃有徵君門故大司馬
孟 督河朱之錫方伯彭而述其著也數以書招徵君謝
勿徃或枉車騎過之亦匿不肯見而族兄 守蘇州六年
賓客闕咽徵君一以書問無恙而已迄不至他日邂逅於
可中亭族兄欲載與俱歸不可則以縑置船中徵君遽捨

船去其介也如是獨嘗一應李文襄公之芳聘當是時文襄以蕩寇功督兩浙建牙於三衢以扼閩衝羽葆檠幢吏從帶弓韃夾陛立上謁者或不敢仰視徵君至則長揖之明日宴於射堂軍中以鳴鏑射戟枝侑酒酒半文襄離席起酌金叵羅爲壽徵君前請草露布徵君且飲且口占授書吏一坐盡傾久之辭去爲畫便宜數事文襄再拜曰敢君良箴吾輩者知君不盡乃以爲文士也徵君內行敦遇三黨有恩紀其於朋好性命也鄞縣周容太倉王昊客死京師質衣爲具含賻視白旛卽路乃返晚與陸堦毛奇齡徐林鴻爲飲酒難老之會月一會會輒權文吏一日偶及

興獻禮并牽連濮安懿王事奇齡以司馬光楊廷和議非
是晉詞狼籍口角流洙墮餐飯中徵君伺其閒也爲一難
以送之奇齡亦未有以應蓋徵君好史法其於明代事尤
悉棘棘不阿然一以心聽皆此類也康熙戊子七月十六
日卒年七十七矣初徵君之生也母張夫人夢偉衣冠者
七人抱一兒投之曰以爲而子請其年曰二七及是果驗
所著古今體詩一百三十四卷古文一百四十卷駢儷文
四十卷詩餘二十四卷他雜著又一百六十八卷子裕孫
慎思編以藏於家皆殺青可繕寫 野史氏曰韓愈稱樊
宗師曰多矣哉古未嘗有也元稹序長慶集曰樂天之長

可以爲多矣徵君亦云然徵君不以自多遇後生一字之
工三復不能已其子之友塤方槩如者把文謁之亟歎以
爲當今無輩又錄其弟槩如詩數篇入所撰驚喜集中然
至其意所不可踰翰音登天不一以色詞假也徵君素彊
無疾前卒之一年家不戒于火盡所嘗讀書燬焉自是遂
病病或挾日不食亦不語曰吾無與爲質矣踰年竟卒其
以書死生如此

此君故奇文亦冲雅

李培園傳

先生李氏名發枝字鹿友培園其號也山陰人爲學奇博多通而一歸於經世務官民兵財經緯本末有叩者訓答申悉霏霏如鋸木屑也康熙丁丑策進士高等才先生者多以行秘書許之顧僅從平調注知縣去旣就選得江南之上海凡四年罷官久之乃起知涇州甫浹歲又改臨海博士官以歸卒家時年八十矣上海賦粟於松江爲冠而戶版多廢名徵發則不知誰某好意錢之戲亭戶私販者滿街俗又憚校小則交捽大卽刀槩相摩以是號難理先生至取其太甚者治之先教後威歲餘則一切衰止一日

坐堂皇有驚相告者海寇至矣居民波迸守將至欲闖城
扉先生曰是駟之鼠也盍治文書問他雜碎事自如而間
遣一隸語民是海舟胥賈胡耳風無方便故跳盪來市中
今行遣之矣或問令今何爲則應之曰方有公事未退食
也居民乃稍稍還尋遂按堵先生嘗言左氏好以鹽好以
暇此兵法亦治譜也整乃可亂暇乃可猝治絲而勢之治
亂繩而急之則敗矣方 聖祖巡松江也邑挽卒須五千
人以上先生念期尙遠而先事贅聚毋爲也人予之庸錢
而約日以待發呼則麋至色第目別逐隊趨而前無一錯
立亂行者監司高其能并移旁縣事屬之爲青浦完城堞

百雉屬役賦功數日而畢雅不好以聽訟名而懸見立刻
齧手如斷有以衣杵擊人額死者置其械而血痕僅濡縷
然囚因狡不承先生顧書吏取他物類杵者蘸以墨而試
其擊痕亦如之獄則立具五通神祟一村婦溺死矣其夫
負之以訴先生命隨至神所鞠之婦指朱衣者曰是矣立
摧燒之而諭其夫此湯公撫吳時所斥淫祀而汝何敢妄
祠之要有便有彼所爲得馮其身以儀也飭斷其香火祟
絕而婦病亦差當是時吳中自大申丞宋公以下交繩先
生擬治行第一而李青天不愛錢之謠歌謳道中人口相
傳以熟制府聞之弗善也會有他嫌因劾罷先生以遲而

其後二十年起涇州治如故操常勒禁歲輸公使錢千緡
曰吾何忍以百姓賣兒貼婦者飾苞苴也竟用是逆大吏
指得下遷云初先生去上海也民哭聲如震雷蛇行蒲伏
相牽挽者自縣門屬之黃浦潮且至兩踝沒渚中先生之
再謝遣之不肯去及涇州人聞且歸走送闕咽馬復爲之
不前然先生初不以缺望在臨海舉白鹿洞學規士經其
指授始有發聞鄉里者郡縣長稔先生有更能時時以民
社事諮處先生亦爲之盡三年乃移病休畧無遷謫意也
先生孝弟純明與人交有終始步以當車還客拜牛剌出
袖中無簪頭廬兒隨焉者抄書滿屋附之世用數爲公卿

聞決諸疑奏而再起再仆故其班班可譜者止此方子曰
古稱宦無中人不如歸田豈先生謂邪然先生當
皇帝初元贊俊遂良赫然召對既稱旨而高安朱文
端公雅重先生時方倚爲相夫君相造命者也振其緒而
出卽百中人奚啻哉然卒擠而止之何也始先生罷命東
江唐公唱以詩有云自古上官須善事於今廉吏更難爲
嗚呼其知之矣

此與藍鹿洲相似亦高安公保薦而卒擠之去者

歸愚文錄引

歸愚文集長洲沈確士先生著先生困頓諸生年踰六十始通籍以詩受知 高宗純皇帝不十年官至禮部侍郎以老告歸在籍食俸 南巡疊加 恩賚 御筆序其詩集以高王比之爲從古詩人未有之榮遇其詩取法盛唐務臻高格近世論者頗有異同要不可謂非正宗也古文不甚著名而規撫先正亦大可觀蓋其時文教昌明體裁橫出朱梅崖倡言復古仰企周秦漢魏獨出心裁蕩無師法先生獨確守唐宋八家評之點之以此教人卽以此自律故所作除談經多陳言外餘文則高者俊偉光明氣

舒神玉次亦文從字順不染囂塵今錄正集中文爲一卷

歸愚文錄

長洲沈德潛稿士著

後學上高李祖陶欽之評

李東陽論

明孝宗將崩命劉健謝遷李東陽輔東宮爲賢主三人頓首受命武宗立宦官劉瑾等亂政健遷東陽極諫不聽繼健遷力諫誅瑾去健遷而獨留東陽健遷瀕行東陽祖餞泣下健曰何泣爲當日力言與吾輩同去矣人以是咎東陽之委蛇而羅玘上書至請削門生籍後世遂罕知東陽之心者從來人臣顯行其節者易見隱行其志者難知東陽之不去一在保全善類使諸臣陰受其庇一在受顧

命之重竊留其身以冀君之悛改而不忍超然去國以自
潔其身當時劉瑾所欲得而甘心者健也遷也焦芳諂事
瑾必欲誅戮正人而遷尤爲所忌以遷爲餘姚人矯旨籍
餘姚者毋選京官揆時度勢諸君子幾於一網將盡而當
日健遷雖奪誥命雖追還服物終得自全其身必東陽弼
縫默救於其間而瑾與芳不得肆行其毒也況健遷而外
如楊一清劉大夏陳熊諸人幾得危禍均賴東陽潛移默
奪以維持之而顧責其委蛇不去假使其時繼健遷而去
舉朝皆焦芳張綏劉宇曹元之徒健遷同類俱爲糜爛所
必然者觀於熹宗朝葉向高爲首輔東林君子不致胥戕

追向高去而楊左諸正人無噍類矣又其時以言誅劉瑾者張永也以計授永者楊一清也救一清之死而使之在位者東陽也東陽不去大有功於國而不能諒其心者第以悻悻小丈夫律之乎哉且窺東陽之心事又有不止於此者蓋大臣之責任與小臣不同受顧命大臣之責任與凡爲大臣者不同當孝宗諄諄以嗣君付託涕泣受之此身已爲嗣君之身矣古來受顧命之臣伊尹遇太甲其變也霍光遇昭帝其常也後遇昌邑其變也孔明遇後主在常變之間也三臣皆殫忠竭智瘁心力以事之而不敢置其身於局外東陽所遭與三臣又異矣主則湛聲色狗馬

宦寺入黨專以聲色狗馬事之而大臣自健遷韓文劉大
夏馬文升諸人外皆焦芳同黨既健遷諸大臣相次斥逐
東陽之勢益孤計一人之力欲除君側而不得卽欲行己
志而不能於是隨事隱忍隨事匡維甯晦其心迹而不敢
標矯矯予予之名窺其用心總欲補益君德於萬一以少
慰先帝付託之重者由是觀之轉覺健遷之去爲其易東
陽之留爲其難則保全善類猶其淺焉者也而羅玘之刺
譏毋乃淑人之識固未知君子之所爲也耶昔狄梁公事
武后人以屈身女主議之卒之婉言諷諫並薦五王復反
唐祚人始服其轉移之功高於亢身去國夫知梁公之有

造於唐卽可諒東陽不去之心也夫

以保全善類受託先帝明東陽之不當去與予所作讀
明史李東陽傳詩同一識解同一機軸先輩先得我心
不勝自喜

陳平論

爲大臣者當國家多故宜持正論以消逆亂之萌不得委蛇嬖嬖以順從其說苟委蛇嬖嬖以順從其說其後雖至於成功而君子知其倣倖於一試而不可以爲訓漢呂后欲王諸呂問王陵陵曰高皇帝刑白馬而盟非劉氏而王天下其擊之問陳平平曰王呂氏昆弟無不可後卒與太尉勃誅諸呂立孝文或曰陵之正不如平之權其說非也當其時直畏呂氏之彊耳豈真逆料後之必能誅諸呂而爲是說哉觀其遷右丞相以後惟求自全之術而不聞早爲天下反正之計及用陸賈計始以千金交驩絳侯則云

呂氏可王時胸中初無成筭可知矣幸而天意在劉酈寄之說行而呂祿可給太尉得入北軍耳假使當時平與勃先呂后而死卽不先呂后而死而呂嬖定策於內諸呂把持於外而酈寄之說不行而呂祿不可給而太尉不得入北軍則高帝百戰而定之天下不且唾手而屬之他人之子哉是平勃之誅諸呂幸也而順呂后以王諸呂說之大謬者也或曰平豈不能爲王陵之言然言之不聽奈何是又不然景帝時欲侯皇后兄王信與丞相周亞夫計之亞夫曰高帝約非劉氏不王非有功不侯帝默然而沮景帝之猜刻幾同呂后而景帝之信亞夫不如呂后之信陳平

亞夫能得之於景帝而平獨不能得之於吕后哉蓋吕后
雖惡以高帝制之猶知所忌也今夫閭巷無知之人頑梗
克悍幾不可以言語化也然責以鬼神祖考未嘗不帖首
而服無他劫之以所忌也高帝吕后之鬼神祖考也陵既
抗言於前平與勃復堅持於後后必有所忌而不敢遽行
其志由是將相輯睦遠近連結吾居其勝以待其隙則天
下大勢在劉而不在吕胡爲苟且阿諛徼倖於不必然之
策哉唐狄仁傑事武后時武承嗣三思求爲太子仁傑從
容進諫風以大義動以至情後卒召廬陵王復有唐室未
聞曰姑順之目前而徐圖之異日也唯高宗欲廢皇后立

武氏而李勣許敬宗之徒覲顏順其欲以釀後此之亂耳
陳平之言與李勣許敬宗若出一轍可以其功之倖成而
護其說之謬誤哉故爲大臣者當以王陵之直諫與狄仁
傑之風諫爲正

論甚中肯筆亦條達

唐宋八家文序

唐宋八家文始於茅氏鹿門撰次後儲氏同人病其疎漏因增益之倍有加矣予賦性謏陋少時誦習祇十之三四年既長亦嘗綜覽兩家選本并八家全文而精神貫注仍在少時誦習者既因門弟子請出向時讀本粗加點定俾讀者視爲入門軌涂志發軔也或謂八家之文果皆以言載道有醇無駁者乎應之曰文之與道爲一者理則天人性命倫則君臣父子治則禮樂政刑欲稍增損而不得者六經四子是也後此宋五子庶能表章之餘如賈董匡劉馬班猶且醇駁相參奈何於唐宋八家遽求其備乎今就

八家言之固多因事立言因文見道者然如昌黎上書時
相不無躁急柳州論封建挾私意窺測聖人廬陵彈狄青
以過激沒其忠愛老泉雜於霸術東坡論用兵頴濱論理
財前後發議自相違背而南豐半山於揚雄之仕莽一以
爲合於箕子之明夷一以爲得乎聖人無可無不可之至
意此尤謬戾之顯然者然則八家之文亦醺駁參焉者也
或謂如子言後之學者唯應於宋五子書是求而迴問途
於唐宋八家之文則何也應之曰宋五子書秋實也唐宋
八家之文春華也天下無驚春華而棄秋實者亦卽無舍
春華而求秋實者惟從事於韓柳以下之文而熟復焉而

深造焉將恠怪竒渾涵變化與夫紆餘深厚清峭迥折
悉融會於一心一手之間以是上窺賈董匡劉馬班幾可
縱橫貫穿而摩其壘者夫而後去華就實歸根返約宋五
子之學行且徐驅而輔其庭矣若舍華就實而徒敝敝焉
約取夫樸學之指歸窮其流弊恐有等於獸皮之韜者吾
未見獸皮之韜或賢於虛車之飾者也文刪存三十卷鈎
畫點讀稍分眉目初學者熟讀深思有得於心由此以覽
茅氏儲氏所葺并窺八家全文更有曠然心目間者治經
義者有得於此治古文者亦未必不有得於此外此唐則
有李習之杜牧之孫可之宋則有李泰伯司馬文正公王

梅溪陳同甫文信國諸公文俱當蒐討
歐漁學者尙究心焉

善于控馭中一段堆垛處盡化烟雲

李玉洲太史詩序

古來詩家主趣者有嚴滄浪主法者有方虛谷主氣者有楊伯謙主格者有高廷禮而近代朱竹垞則主乎學之五者均不可廢也然不得才以運之恐趣非大趣法非活法氣非浩氣格非高格卽學亦徒見其汗漫叢雜而無所歸蓋詩之爲道人與天兼焉而趣而法而氣而格而學從乎人者也而才則本乎天者也人可強而天不可強故從來以詩鳴者隨其所長俱可自見而詩人中之稱才人者古今來祇數餘人相望於天地之間玉洲李先生今之才人也少歲出語卽能越俗旣與張匠門先生遊匠門故以才

自豪卽以才接引人者兩才相遭引而愈出故玉洲之詩
因得肆其才於陶冶萬類籠挫一切之餘水銀硃砂入其
鑪鞴皆成丹也么弦雜韻經其和調皆成樂也鮮如時花
嬌如美女而惟奇兀磊飄忽出沒比之絳蛺天際神山海
上而不可端倪前人所云曠世逸才驚才風逸者不是過
焉已先生家吳江往來吳門兩地多詩社先生詩成衆口
交服酒闌燈灺出片辭單語俱有才華流露其間旣成進
士列侍從鋪陳雅頌淵涵金石仍以才爲主而不拘尋常
應制格律品極重焉旣又脫然去官得以蕭閒無事之身
一肆其力於詩歌以其獨得兼有衆長求之趣趣益以流

求之法法益以合求之氣氣益以盛求之格與學格益以
老學益以化而總由於才之益縱橫自得出天入淵而不
可控制蓋其得於蕭閒無事者爲已多而天之與之不獨
厚者也抑聞古人文章每得江山之助先生之蜀走棧道
入劔閣經白鹽赤甲吊屈原武侯杜老蘇公遺蹟客山左
登泰岱謁孔林觀蓬萊天風怒濤青紅海市諸幻境今留
關中過秦漢唐之故都覽潼關之防衛望華嶽終南武功
之形勝天授之才有擴之而無盡者宜其詩之隨境變遷
全乎天而自兼乎人也潛與先生以詩定交垂四十年每
相見必示新詩間有彈射欣然得意然其詩終退讓爲不

可及莊生云送君者自厓而反君自此遠矣潛於先生詩
其有自厓而反者乎

篤論可師文筆亦暢

答滑苑祥書

潛白前賜書殷勤詢以作文之法并冀僕規所未至若以僕爲識途之馬然僕非嫻於文者也而文章家之流弊或能言之往見有明中葉一二鉅公倡導天下謂作文當師先秦漢京句取其拗字取其僻而先秦漢京之精神不存焉其病在襲於是詆諆其後者救之以唐宋八家以平坦矯其拗顯易矯其僻而唐宋八家之精神不存焉其病在庸而詆諆者又隨其後嗟乎根本之不求而面自形體之是徇此亦一是非彼亦一是非吾知相訾無已時也夫文章之根本在弗畔乎道顧吾之弗畔乎道要取諸古人之

文之與道爲一者而古人之文不能盡然自唐虞三代以
來理則天人性命倫則君臣父子治則禮樂刑政如江河
喬嶽萬古不可磨滅者六經四子之文是也自兩漢以降
如賈誼董仲舒司馬遷劉向王通韓愈歐陽脩曾鞏之徒
見乎道而醅駁參焉者也他如莊周列禦寇諸子之文汪
洋恣肆而磔裂乎道蕭統氏編輯之文辭采爛然而不根
乎道有宋諸儒之文幾於道矣而於修辭養氣又不能與
賈誼董仲舒以下諸人比埒然則舍六經四子外胥可屏
而棄之耶曰不然六經四子吾之宗旨也六經四子外吾
之問途於其中而分別去取焉者也其間合者究其所由

合離者究其所由離吾折衷乎六經四子之旨將合與離俱爲吾用而背乎道者亦可引而正之以歸於道則文章之根本立矣根本既立次言體法體與法有不變者有至變者言理者宗經言治者宗史詞命貴典要叙事貴詳晰議論貴條暢此體之不變者也有闕有闕有呼有應有操有縱有頓有挫如刑官用三尺大將將數十萬兵而紀律不亂此法之不變者也引經斷史援史証經詞命中有叙事叙事中兼議論此體之至變者也泯闕闕呼應操縱頓挫之迹而意動神隨縱橫百出卽在作者亦不知其然而然此法之至變者也吾得其不變者而至變者存焉旣觀

乎道以探文之源復準乎體與法以究文之流而且運之以才輔之以情深之以養達之以氣夫然而發而爲文若吾未嘗標新矜異於古人而古人自不足拘繫繩縛乎吾則其言自吾而立而秦漢八家之見俱可不存又何至沾沾焉逐人後塵以日汨沒於濶倒波頽之中耶雖然知乎此實難知乎此而能造乎此則尤難不多讀書則絕其原不得師友之輔翼則迷其途不定其灼然不變之識則是非毀譽得以淆其中而又雜以科舉干祿之學而又應酬世務標榜聲氣以入於苟且求名之所爲其氣鮮有不昏抑鮮有不撓者唯摒擋一切與二三同志遯跡於荒江寂

寘之濱相與切磨日月經困頓寒餓而不乏少懈則於斯
藝也蓋庶幾矣雖然僕亦第能言其失得云爾其失其得
未必果有當也又昔人親見揚子雲容貌祿位不能動人
恒易視之況僕之抑塞連蹇者耶緣前書誦切聊據所見
亦用此自厲祈至於少進焉潛頓首

根本體法其言粹然一出於正末一段鞭策尤緊古文
豈易言乎哉

三孝子傳

黃孔昭字含美吳縣人中崇禎癸酉鄉試官雲南之大姚鼎革後兵阻不得歸子向堅字端木子身往尋之以家事付其妻曰此行不見父母決不歸也宗族隣里皆阻之不顧既出門遇客之舊往滇者詢之告以道路之遠山川之阻戈鋌之擾潛狙虡虎之虞與盜賊剽掠猺人獐人番鬼之險惡復阻之卒奮然往一蓋一笠披零丁帖走萬里外越關隘數百重將至滇滇人訝其形容衣服不類欲加以刃時兵戈未靖疑爲間諜也向堅告以實慟哭如嬰兒取釋之至白鹽井遇父母及從弟向嚴俱無恙喜極而泣鬢

獠感動踰一年得歸歸時途中與弟親舁籃輿怡然無辛
苦色也始順治八年十二月訖十季六月往返二萬六千
餘里吳人作樂府傳其事同時孝子又得二人曰顧廷琦
曰劉龍光

顧廷琦字佩堅長洲生父繩詒崇禎庚午舉人知蜀之仁
壽縣張獻忠破成都不屈死天下既定廷琦徒步入蜀翼
面赤踝前後闕四寒暑始扶櫬歸中間川水暴漲幾死絕
粒數日幾死遇盜劫幾死臨高山嶮巖墜深淵幾死而卒
不死不死而卒扶櫬以歸天相之也方廷琦之成都山川
猶存城郭易位無有知瘞薶處者呼號路側誓不欲生由

遵義邑名民訪之殷繼周黃珪由殷繼周黃珪訪之文運由
文運訪之曾大禮始得之龍腦橋側廬墓數月往返亦萬
四千餘里抵里門髮鬢欲白矣詳載廷琦自撰入蜀記略
中

劉龍光字蓼蕭亦長洲生父廷諤官益王長史國初道梗
不遁龍光始以省試歸至是扶病往達建昌益府故人無
在者禱於張令公之神夢中若告以石際語然不知所謂
久之遇一女僧云石際在閩粵交方今官道阻兵須間道
可達龍光冒死穿藤峽一綫天踰白石嶺萬仞蟻旋而下
血漬雙足過山麓果遇母於石際空邨中名見娘村宋孝

子王龍山見母處也父先一年死矣奉母扶觀歸孝養十
餘年母沒以哭母得心疾終其身

沈子曰語云世亂識忠臣亦亂後知孝子也三孝子行吳
人視爲極難而孝子之心若孩提亦能之者吳江計孝廉
東性不肯下人獨以師禮事黃孝子嗚呼孝廉之學殖才
華果出孝子下哉

三傳叙次各別

黃太常傳

公諱性震字元起姓黃氏閩之漳浦人年十二父母俱喪
家貧艱於爲生然有大志讀史遇豪傑崛起事聲色俱動
隱隱竊自負年旣壯益練習當世事時海寇鄭成功竄居
臺灣公於閩海要衝澎臺形勢凡港汊險易塞島出沒及
賊情向背一一熟悉於胸然而困逾甚人無繇音之也歸
化令名易公族子寄籍粵東官於閩見公與語曰叔非夙
塵中物幸自愛公曰世無常何誰識馬周今海寇未殄廟
堂需材吾如涉川之舟須吾友揚帆風飛耳甯能長此鬱
鬱乎時公年四十矣會閩督姚公啟聖奉 命平寇公謁

軍門條平海十便姚公用其策相與密謀遂平臺灣公之
獻策也首言兵法攻心賊祖孫父子踞海識形便臺灣天
險誠難爲力今鄭經溺酒包子幼弱將不一心倘能不降
官爵金帛誘貳其黨披其腹心賊易易平耳姚公稱善曰
此陳平所以斃項籍也吾以此委君矣公曰未也賊今新
陷海澄數勝而驕驟撫之是示弱也宜伺間出奇大挫其
鋒收諸要地以蹙其勢師喪地蹙孤島難恃然後撫而懷
之其心乃離澎湖可一戰下也姚公曰此項籍所以降章
邯也稱善久之於是出龍虎山復長泰縣大破賊於西溪
奪江東橋水晶坪等處公曰可以撫矣乃大開修來館於

漳州來降者予官服車騎卽亡無所問卒有亡入賊者皆
誘示所有賊心動謀至密飭諸營厚款之謀卽以情輸戰
有日矣或填館舍盛供具大書某鎮某官公館聲言某月
日某將當來降賊互猜貳歸者曰衆賊黨曰孤我師一鼓
而下十九寨遂復海澄克廈門金門經遁歸臺灣身死子
克塽澎湖一戰面縛海寇平諸將克金廈門時議悉誅賊
黨而以其子女資財犒軍公密白姚公申禁令全活數十
萬衆先是制府上公功廷議以同知用奉 旨優叙以僉
事道用至是加軍功級授霸昌道盖異數云公之蒞官由
霸昌道擢廣西按察使尋擢湖廣湖南布政使以病乞休

家居七年再起總理永定河工竣晉太常寺卿卒於真定
官弱昌時其地滿漢雜處故多鬪馬刼掠公陰遣吏入盜
夥廉其姓名巢窟悉擒治之旗丁重責剝人至沒入其妻
女公下令聽民贖回不從者置之法咸震讐無敢犯官廣
西時適遇大容山叛寨辭連高廉羅肇潯梧柳慶八郡人
獄幾滿公擬斬渠魁崔枝玉等餘皆釋屬天寒男婦計白
授衣市廛中布爲一空歡呼聲動天地總藩湖南時值武
昌夏逢龍亂已陷圍府廷議方出京軍上曰湖南有黃
性震在彼佐平數十年海氛何愁么麼跳梁輩且襄陽有
總兵蔡元二人必能了之蔡元者破逆藩時有功者也時

撫軍亦議請兵公謂用兵如治亂絲緩之則其緒自清急則勞矣今第靜鎮以安衆心俟賊焰少熄撲滅之一偏裨力耳何爲張皇以生四方伏莽之心哉未幾賊果破逢龍誅死公之總理河務也治法五里設一旗一礮旗書監督人姓名有令則發礮遠近聞聲馳赴士卒各下堵塞帚料隱然以兵法部署也前此數年績弗成者四閱月訖工上嘉其功一日五召見授太常卿方欲大用公而公積勞成疾遽不起矣卒年六十有五未竟設施宇內惜之長子尙寬康熙丙子舉人江南蘇州分府江撫儀封張公委巡視通省河道時制府倚撫張公因中傷分府誣以糜費帑

金落職今 天子眷念功臣後得邀 恩卹公孫日煦函
公行述走三千里請爲傳予掇其大者傳之俟史官采入
國史傳中

贊曰鷺鳥整翮奮擊秋風蛟龍盤屈變化雷雨貴乎乘時
也公發謀破賊揃刈梟鯨武功赫矣戢姦蘇枯波臣安恬
文德懋矣然當貧困無慘時智謀才術一無設施不遇風
雲之期垂翅蟠泥猶庸豎也嗚呼士之抱奇才而低首抑
志爲俗士小夫所鄙笑者可勝道哉

黃公一代偉人此文寫生處須眉欲活矣

劉先生墓誌銘

先生姓劉諱首昂字聞客江右安福人世爲安福右族少負氣喜談兵生值明季歲甲申流賊破京師明年乙酉王師下江南時天下未平草寇竊發有逆僕某糾亂兵數千據山谷叫號殺奪死傷者夥劉氏祖廟被燔先生奉母奔竄負創幾死賴救免少愈奮泣曰我家祖廟旣毀族黨不保何生爲若不勦賊逆復祖宗仇非人也刺血書狀號於閭閻楊公公憐之發兵二千往剿頓師六日徵餉迫促無應者幾激變先生傾家贖族屬供餉晝夜督率數瀕於危始髮櫛而草薶之揃刈奸慝復我宗族修祖廟妥神主

爰復舊觀方逆之旣勦也喜事者以爲從未殄乘先生往
詣閣臣駢集拘係欲置之死人心復搖先生聞之急馳歸
釋縶縛縱之去衆心怙然後折節讀書籍學宮食餼絃誦
暇仍講擊刺戰陣法衆嗤之先生曰將有所用之也未幾
果有逆藩之變逆藩者吳三桂也康熙甲寅反滇南勢連
江右吉州降附郡縣響應人多懼擾謀附之以緩禍先生
矢於衆曰吳逆旣不殲明又畔本朝不忠之尤者彼行援
首奈何味心應之衆皆曰然又曰方今勢窮感徒困守無
益爲目前計練鄉勇樹柵欄置火器結四方鄉兵爲援計
無急於此者衆皆曰然遂一一行之已而僞帥劉集統五

千人薄近邨將會兵攻吉安先生合鄉兵迎敵迫於險幾
爲賊擒賊中有反戈刺其將墜馬者詰其人卽前所釋脅
從中一人也遂乘勢追逐戮殷者數賊僞帥退然終訛言
朋起日夕數驚先生曰此詭計搖我志耳守益堅一夕有
僞帥遣人至曰從我當得大官授剄爲券否則屠遠近如
雞豚從爾家先先生叱縛其人遞送大府戮之又一夕盡
燒邨前積薪煙燄蔽天先生誠曰無動率衆靜以待之寇
偪發礮石轟擊乃遁去後屢至屢却寇不敢窺當是時妖
氛方熾人心蒼黃其不靡然從風者罕矣乃一夫之志屹
然山立奪衆論冒九死率能保全遠近由明順逆秉忠義

者素也丁巳 三師復吉江右漸次平凡有扞禦功者皆
授官先生功爲同姓武弁攘去沉晦恥自言有代爲陳者
不報後循例以歲貢生終嗟夫人才不易得而廟堂又急
於需才今有其人又有其功而卒使之鬱塞以老此足爲
國家操用人之柄者太息也強藩旣甯先生不談兵事奉
母暇肆力古學謙退巽順不矜不盈遇有爭競者陳理義
利害如春風拂人聞者忿平躁釋教子嚴義利之辨曰人
欲有爲當自不貪始又嘗言節己方能利人不節己己先
太侈太侈則耗盡欲其及人不可得焉爲文章有根柢著
有古忠臣言行錄諏巖兵陣圖法六卷於戊辰某月日卒

年六十七未卒前一月夢宗忠簡公招之寔曰我當逝矣
已果得疾或勸醫藥不從遂卒識者謂之知命劉氏出長
沙定王後宋帝昀時輦米千石助文信國勤王者二十五
世祖也諱莘隱高祖諱燿判泰安州曾祖諱仲垣祖諱繼
志諱寶珩者考也名諸生明末時嘗夜觀天象知天下將
變誠其子傾產捐軀義勇自激憤時事不可爲歔血死先
生識其言生平遇事敢爲奮不顧身承父教也娶瞿孺人
繼留孺人先卒子男子三長昆灃次昆潛康熙癸酉科舉
人知嘉定縣次甲祥縣學生孫男八人曾孫男十人仲子
既令嘉遇覃恩例得贈先生如子官而以清介自守不能

執轍事上官被黜不及蒙恩宜仲子之縷述先德歛歛欲
絕也某年月日已葬先生於廬陵之永福鄉而墓隧之石
其辭未立罷官後手狀乞誌銘潛無位不文不足增前賢
光也鑑其誠乃銘銘曰 狂獬跳梁哭依庭牆齟其奸猖
孽藩吞屠且戰且驅保全疆隅孝敬祥順敦忠守信秩秩
家政同善於人眾草薰蘭凡鳥親鸞涵泳聖籍名不稱德
後起滋植存何有歉音欠沒何有憾永壽匪斲高原坎中歸
藏位宮千載是崇

此公可謂老謀壯事矣文亦足表章之

王耕煙募誌銘

從來藝事之極者必歸大家論詩推少陵論書推平原而論畫於宋推北苑於元明推子久石田此三人者畫中之少陵平原也當今之世能繼北苑子久石田而興起者則有畊煙王先生先生童時無嗜好嘗引荻畫壁作山水卽生動時婁東二王先生以畫擅當代名二王者奉常公煙客廉州公元照也廉州過虞山偶於壁間見小幅驚喜甚詢之知王氏子物色之甫易冠也歸語奉常奉常具舟迎館於西田盡出唐以後名畫俾坐卧泳游其中而四方收藏家輒往還蒐討心遊目想盡得古人秘奧而一以靈心

運之垂二十年遂成大家先是館西田時倣古入神廉州
忘分推服曰此非吾弟子三百年罕觀此人矣而前後稱
揚如牧齋梅村樸園等漫堂諸前哲或見之記載或形
之詠歌推爲大家無異辭繇是 內廷知其名徵召之以
山林士待 詔輦下方其繪 南巡圖也天下能手駢集
咸送巡莫敢下筆先生至口講指畫凡山川形勢 六飛
七萃諸大小臣工與夫老幼男婦之顙顙望幸者咫尺千
里如印泥聚米然衆遵守分繪而先生總其大成圖成
上覽之稱善欲授以官先生以不能任職辭出都日公卿
祖餞賦詩贈行傳爲盛事以是知先生所重不在人爵而

村老所云丹青不知老將至富貴於我如浮雲者乃於先生信之也先生篤孝友慎交與不翁翁熱尤重感知己奉常廉州沒歲省其墓至老不忘乞畫者無虛日必慎擇其人否則巧取豪奪不可得晚歲煙雲供養外吟風弄月自足性天以是終其身殆隱於畫而畫外別有事在者耶先生姓王氏名翬字石谷畊煙其號宋忠臣堅之後世爲常熟人祖載仕邑諸生考參龍湛隱嗜古亦以畫聞猶石田之先有貞吉也先生生於前明崇禎壬申二月二十一日卒於康熙丁酉十月十三日年八十六配錢氏有淑德子二有譽邑諸生疇太學生孫五人某某曾孫八人某某乾

隆癸酉得吉壤冬某月日葬先生於虞山北麓曾孫玖大
椿來請志墓玖亦善畫與予善大椿邑諸生嘗問業於予
者也其烏容辭予聞國初畫有三王之稱謂奉常廉州與
先生也後有二王之稱謂先生與麓臺侍郎也分位懸殊
聲望則一又聞惲南田壽平寫山水兼神品逸品見先生
畫曰我讓子爲第一人遂專工花卉稱絕藝於此見南田
之虛衷而先生之致其退讓者實有無忝大家之目而畫
外之品尤有足重也夫銘曰

烏目秀起蔚生名人造化在手寢食煙雲辭榮還山耄年
頤神昔親杖屨歲惟丙申別餘一載辭塵歸真於今三紀

交其曾孫逢君歸藏來徵銘文文無愧詞勒諸貞珉後之
過虞山者謂此畊煙幽窈而隣于游氏之墳也耶
評論無媿詞文亦爽豁

黃尊古墓誌銘

當代以畫名者五人武進得惲壽平格太倉得吳歛山歷
王麓臺原祁常熟得王石谷輩最後得吾友黃尊古鼎五
人中麓臺第進士官侍郎顯名最易四人逸老布衣而名
與之齊覺四人較難然壽平漁山石谷得

吳

祭酒梅村王司寇阮亭諸公前後道揚宜其名流播遠邇
而尊古當諸公徂謝推挽無人竟以筆墨見重人世尤爲
難中之難也生平好遊覽嘗之齊魯登岱歷燕韓趙魏入
秦登太行終南太華諸山又出塞垣數千里經于闐近身
毒國至踪跡俱斷乃還後巢黃山上匡廬羅浮九疑陟嵩

衡升我岷嶺攀岷山窮長江之源後乃入天台鴈蕩武夷
諸勝杖屨所到凡詭奇殊絕之狀一一寄之於畫前人粉
本中未嘗有也吳中評畫者謂石谷看畫古今名畫下筆
俱有成處得稱大家尊古看畫九州山水下筆俱有生氣
並稱大家兩人皆虞山人故同論云尊古性伉爽不受繩
縛在京師時有故相欲招致其家尊古約曰能不限出入
惟命及至諸門下希韞韜踞尊古獨長揖言辭侃侃故相
敬禮逾厚然見故相權重任久傾軋者多恐將及難堅辭
去及故相罹禍時尊古在粵中經六千餘里入都相與哭
別旋南還晚歲有制府係舊識具書幣招往秦中旣至聞

制府縱恣無節曰安有繆盪如此而令終者遂策馬還竟
不往見途中惟寫終南雲氣武功太白諸圖以壯行色聞
者高之性孝友葬大父母不諉之世父後葬父母不諉之
弟後世父未葬者葬之弟之子貧無歸分己產給之餘如
養姊妹之寡者卹姻族之乏者周故人之單寒者歲以爲
常客至燕飲嘯歌日夕不厭四方餽遺費盡爲度不爲後
日毫髮計少時學畫從卽高士嶼雪入都後師麓臺待卽
然每與人言淵源所自曰我卽先生弟子也旣老寓吳有
以畫請業者講貫不少休嘗言畫品超逸過於沉著然不
沉着不能超逸又言吾所指授者乃馳轡古人之途若骨

和丰采精神氣韻隨其人性情學問變化之毋沾沾面目
爲也前此吳中久無畫師沈文唐仇風流遼邈得尊古提
唱而陶鑄之南宗正傳或仍在後賢繼續中而尊古沒迄
今無聞尊古號曠亭又號獨往客晚又號淨垢老人世居
常熟之唐墅鎮以雍正八年四月二十五日卒距生順治
十七年二月初九日春秋七十有一配倪碩人事上接下
動中禮節使尊古走萬里外無內顧憂者碩人力也子理
常熟縣國學生孫大年歲乙卯某月某日將卜兆於吳縣
某原謀銘憶丙午歲尊古嘗飲予以酒謂他日得子志我
墓是吾願也而今果然銘曰

畫師心心師天歸自然神理全急奔義避權貴散榮利身
無累行萬里憑孤筇歸去來藏幽宮人云亡粉墨在煙雲
中永不壞

此文與前篇並佳畫不沉着不能超逸予謂文亦然

李泌論

唐代稱賢相前有房元齡杜如晦後有姚崇宋璟論已定矣然房特長於造謀杜特長於決斷又當太宗開國之時入參帷幄易於見功姚初作相先以十事奏請要於必行史重其才宋於武氏朝壓服權幸於元宗朝持正直諫史重其守而其時正值開元銳意求治君臣相遭如水亂此四人者均可謂之能臣良臣許以社稷臣猶未協也若夫上有昏辟之主下多媚疾之臣艷妻宦豎交訐於內強藩巨寇跋扈於外以一身挺立其間卒能全天家父子兄弟之倫建破賊之策表公忠之績安有功之臣守經行權而

無一不當者洵社稷臣也三百年中斷推李泌一人泌於肅宗朝張良娣李輔國煽惑構禍肅宗上不知有父下不知有子已殺建甯又欲殘廣平泌引黃臺瓜辭以動之謂今瓜已一摘矣慎毋再摘肅宗感悟而後廣平始安後德宗朝君益闇盧杞張延賞並姦上聽讒言欲廢太子而立姪舒王泌嗚咽流涕謂先帝懷危懼臣誦黃臺瓜辭肅廟乃悔而泣今陛下既知建甯寬而先帝幾危願深戒其失請以家族保太子後三日上稱太子仁孝卒以無他此泌全天家三代之人倫也至功之見於外者前此李光弼擊破史思明泌勸帝乘西域之兵來會直取范陽絕其根本

此杜詩所云聞道河陽近乘勝司徒急爲破幽燕是也帝以爲迂而不用德宗時羣小謂韓滉修城陰蓄異志泌力辯其忠謂職任糧儲勤於貢獻脩城以備迎駕正其忠也上從之詔令輸糧以救旱荒滉卽日發米百萬斛關中無飢上以泌爲知人後張延賞輩欲害功臣泌謂李晟馬燧有大功於國陛下勿以功大而疑二臣二臣勿以功大而自疑則國家永永無患此泌之審量兵機而一一保全善類也合內外計之如行敗絮荆棘中而脫然行所無事智比張子房忠愛比諸葛孔明而又合兩人爲一人能不目之爲社稷臣哉而豈房杜姚宋所能及哉後劉昫成唐書

以泌嘗有還山求仙之意因作傳次王嶼下幾與佞倖私人同列夫泌之求仙卽與從赤松子遊祠黃石同意欲潛身遠害於昏濁之朝也且如顏平原忠直至於殺身成仁而學問或間雜二氏彼雖間雜二氏初不礙其忠直也曾是有還山求仙之意而卽可泯其生平之大節乎予故表其爲社稷臣并以正舊唐書之失

舊唐書之失固然卽新唐書本傳叙鄴侯之功亦未盡予常作文料之

元和水利議

從來言東南水利者莫如范文正公仲淹上宰臣書
郊司農丞亶六失六得書單進士鏐吳中水利書其
間或主得水利或主去水害主得水利者卽大禹溝
洫之方主去水害者卽大禹決排之法此皆言全吳
水利而一邑之措置不外此也元和水勢上承具區
下注崑山太倉以入大海澹滄潯泖盛於他邑使蓄
洩寡術無以治水卽無以治田茲倣古人遺意而變
通之先陳水患次陳治法有農田水利之責者得以
考鏡焉

行水之法上流宜䟽下流宜洩太湖受宣歙杭湖諸山之
水而分入於三江其出吳江垂虹橋順流而東漸次入吳
淞江者境中上流之水也承吳縣鮎魚口之水遶郡城而
東歷崑山太倉從劉家河入海者境中下流之水也上流
宜䟽明侍郎徐貫議開吳江縣江尾菱蘆之地鑿長橋水
竇導引太湖之水散入吳淞江澱山湖二處業已見之施
行矣下流宜洩范文正憂患靖周文襄諸公或開茜涇下
張七鴉鹽鐵等處由劉家河直達於海開白茆福山海許
浦直達於江歷歷有成效矣而邑中水利不興一遇大水
巨浸稽天有渟渟三五月而不得䟽通者及猝逢熯乾土

田塋确無從引水灌溉揆厥所由一由上流下流等處前人功績未能繼續疏洩既久漸就湮淤一由境內之水縱橫旁溢而治水治田之法無人焉條議而爲之備是以旱旣苦旱澇尤苦澇而上田下田鈎蒙其害也夫元和水勢旁通衆瀆上流諸水譬諸咽喉下流諸水譬諸尾閭而境內諸水則其腹也咽喉不入尾閭不洩固足爲生人之病然使咽喉可入尾閭可洩而腹中飽滿不能承受以達之於下其不同歸於病者幾何則元和之水利不可不急求矣顧欲求其利當先知其弊約而言之其弊有五高鄉之人但期通水而不知濬渠蓄水所以常苦旱低鄉之人但

期洩水而不知築圍陣水所以常苦潦偷目前之安忘他日之禍一弊也浦瀆涇港歲久不濬舊畝之泥霖雨蕩滌漸入於河日積月累河身填淤不能容水二弊也河之四旁雜植菱蘆菱蘆既生泥沙附之可種菱芡菱芡蔓衍泥沙愈多可種稻苗有力者陞科輕糧傳爲世業入之版籍而不知河流日狹驟成平田淫雨暴漲膏腴之壤遂並爲巨浸以前所陞之毫末易所汨之鉅萬三弊也明末至今中間嘗建開河之議矣然知治水而不知治田所以民之受益者寡蓋開河而不築畝則水終亂行開河而不得蓄洩之宜則水旱無備加呂吏胥侵漁豪右梗議金錢糜費

不旋踵而仍復壅遏四弊也古者治水治田各有專司唐
宋以來都水有監營田有使開江有卒撩淺有夫前明水
利等官巡按御史何永芳奏請革除自後屢興屢廢既無
專官而爲有司者唯以簿書期會可幸無過鮮有目斯民
疾苦之原國家財賦之本留心經畫以故水政日壞五弊
也積此五弊而不爲之所尙得歲稱豐稔以供上上之賦
乎哉朱郝直云治田者本治水者末不治其本而決其末
蘇州之田百未一二治也條列四事酌而行之一曰築圩
裹田二曰開治港浦三曰修築塘泖四曰除去壅塞古人
云圩者圍也內以圍田外以圍水蓋低鄉支河之水容受

厥流比田反高若非設圩岸巨圍之則彌望皆水勢不可
田范文正公云低田賴圩岸甚於都邑賴城池乃篤論也
築圩之法略分三等水中創立無基而成者必用木用石
方可奏功此最難者也平地築基雖無可憑藉然不費木
石積累自成此稍易者也向有古岸後漸傾頽者止費修
葺不煩剏豎此又易者也其間岸之高庳更須相度地勢
大抵極低之田務築極高之岸其田之稍高者岸自不妨
稍卑雖田有高卑而岸能齊一則無患矣圍岸之內又須
別立于岸其高下較圍岸之半而過之蓋慮外圍水浸易
壞故復作內圍以固其隄防兩者層次東水捍禦旣周而

又每處立圩長一人越一二年率逐圩之人修治之將田
治而水亦與之俱治昔熙甯四年蘇州大水獨崑山陳顥
陶湛晏數家之圩高大了不爲患是有明徵此築圩裹田
治下田之最急者也開河之法循古人遺意或五里七里
而爲縱浦或七里十里而爲橫塘塘浦濶者二十餘丈狹
者十餘丈深者一二丈淺者幾及一丈卽開濬之土築爲
隄岸塘浦日以濶深堤岸日以高厚其法先開支河旁及
支中之支次及幹河旁及幹中之支慮奸僞售欺則立信
椿於水以試之慮淺深不一則行木鰲於水以齊之如是
數年遠近無不治之水而河之勢自高於江江之勢自高

於海矣他如松江近海高仰之處凡江流潮汐可以引入者或爲從浦或爲橫塘亦如下田之法而深則過之將旱可屏救水可旁瀉此高下之所共爲利賴者也隄之當脩者如至和塘達崑山七十餘里塘之兩岸舊又有六塘四十四浦六十四涇以接引湖澤滅渡橋南塘達吳江三十餘里吳江以上三十餘里元和塘達常熟幾及百里塘之兩岸舊皆多設塘浦涇港一以承太湖之水一以泄昆承陽城二湖之水歲月旣久波流蕩鬻日就廢壞塘浦涇港亦多闕過宜築土甃石務完務堅而又廣爲橋梁醴其渠以出水走其流以至江俾向時規制一朝頓復利溝洫之

宣泄通行人之往來莫便於此至論除去壅塞其向爲河身而今爲平陸者則稽其故道量其淺深而開除之其芟蘆叢生菱茨葭蓼與夫橫截魚鱗約束水勢致波流不行湖沙漸積者則嚴爲禁止而疏滌之不規取乎小利不阻撓於權勢不委任於奸胥二三年間諸弊可除河流自濶河身自浹也凡境內之水總宜加開除疏滌之功而吳淞江一帶漁利者倍多壅塞亦逾甚相厥緩急而次第施之則無此患矣顧天下事專任則易爲力兼及則難爲功今府州縣正官職守煩重佐貳事權又輕宜倣弘治年間舊例或設郎中一員或設主事一員專職水利董率屬官曉

諭鄉民務使潁河之田以次修治先治低窪次及高區果
實心任事者督撫勘驗上聞於朝以憑超擢則職守者競
勸民利不期自興此事之歷久可行者也不然人事不修
譖之天行上下苟安隕墮無已其害可勝道哉若夫上流
之水縱未能如單錫之議建千橋於吳江蘇子瞻之議盡
徙吳江之民以爲他州之利然如長橋之七十二墩凡填
爲平壤者須急疏通而豪強侵占菱蘆之地宜盡加墾闢
使水行迅疾其流自達也下流之水如茜涇下張等處前
人所開鑿者宜循其故道歲加浚深而渾潮泥沙不致倒
入也如是境內之水利脩上流下流亦受其益上流下流

之水利脩境內益蒙其利水治而田無不治矣謹議
先生詩人而留心時事如此可與震川水利議並讀